

24 "Nasaretihandaahapi Jisaasihoýe kinyi nehi Autaahaatiho maaritimbipaahihi kaimbihoyitihi nyahi aimi gisonaahiyaane. Isi kinyi nyangi nanyopisasitaapi napaapi napise? Nehi nyainjase?" undawaatopo.

25 Saundauhi Jisaasiho itipihohi maipihapai waapihita saundataase. "Sahi utaamoai namasi kaahaamaatiwi nehi bipi noaipasi nuwise," undataase.

26 Sata kaundihi itipihohi maipihapai utaahohi nepi waati ahowiwi kisihihiwi waati kaahaatimi noaipasi nowaayopo.

27 Itipihohi maipihapai Jisaasihomi piwihi atiwiwi bipi noaipasi niyauhi isihia sandi mmonawa nahatiya yaiwimapi maariho owesuetihi sawana sanawaatopo. "Kimandi wani napindi noaipasitihohi? Kimomi kanyatindimandi wanihandi wipetahandi watipihande. Iyati ami itipihohi maipihapai waapihita kaundihi bipi atiwiwi utaahomihetapi noaipasi nowaayopo," tiwi kanawaatopo.

1.32-34

Kima Piwima Isihia Timbipaisahiyai Kiyaami Timbipa Jisaasiho Nemwati Titihemwasitihandapihaare

32 Aihhi kura asahataahura ipihohi aimi namaatipati asisiha napandosihhi isihia timbipaisahiyaisuni ami isihia itipihohi maipihapai neti daahi ipihatisa bimisawihiyaisuni numwaasi Jisaasihohapihi nasawaayopo.

33 Aunahipa sataahapihiya nahatiya ayaayami maasometeti masapipihhi ahoyanawaayopo.

34 Isihia timbipa kahapa kahapaisawihiyai nemwa titihwiwa itipihohi maipihapai neti natausaasataise. Iyataati itipihohi maipihapai Jisaasihohi Autaahaatihomi Mwaahoso tiwi usoniwi gwinyaahauhi Jisaasiho, "itipihoyi maipihoyi kaahaamaatime," undati maahomwaaýi neti nuwisapuwataise.

2.1-12

Kima Piwima Utaaho Wo Ikwauhiri Biwateti Namihatati Napohoi Jisaasiho Titihemwasitihandapihaare

1 Asisiha aimi waiwa sanaihi Jisaasiho japihi Kapaniyamihandaahapi nasataise. Japihi napihi isihia Jisaasihohi aimi japihi nasataise tiwi kaniwi gaamatawaayopo.

2 Saiwi Jisaasiho aimi yamore tiwi atisawaawi isihia taahiyihia napiwi ahoyanawaayopo. Isihia ayaayami deti maasomwaaýisangi tisaitiwi sisipa

yondaise isihya nandaitihira daihira apipaahi owetato. Aihi Jisaasiho Autaahaatihomi piwiha kiyai ausaati kaundataase.

3 Aihi isihya murimuri utaaho wo komi ikwauhiri namihata biwatehoai gwithoti ahiyawu tipwinji Jisaasihoaapihi nasawaayopo.

4 Tipwinji napiwi Jisaasihoaapihi nandaito tiwi mmonawa isihya tisaitataati nandaitihira daihira apipaahi owetihhi namapi ayihandami ayitaupwataatihhi koai nesi yamwaawaayopo. Nesi yamwaapi mihasini ayitaupwataatihhi bitotawa titihhi Jisaasiho bitosisisini ayitaupwa nawatawaayopo.

Nawataposawi utaaho gwithoti kiyati nanototihhi wirihireti mihatihhi Jisaasiho bitosipihhi nusoasawaayopo.

5 Isihya siya Jisaasihopi utaaho watipihosi nga utaamo kimoai titihemwaitaise tiwi giwunyaahohitihandi Jisaasiho usonataise. Usonataati utaaho ikwauhiri namihatisihoai Jisaasiho saundataase. "Nisi maasiho kinyi maipihaiwa nahatewa nini aimi nehimataayo," undataase.

6 Sata Jisaasiho kaundihi isihya usa Judaahiyaami winihapipa katiwunjohiyihhiya sa piwa atisawaawi kiyaami maarihoatihapi saiwi gwinyaawaayopo.

7 "Kimo satindimandi, 'Maasiho kinyi maipihandi nini aimi nehimataayo,' tindimandi napaapise? Autaahaatihohihi nga maipihaiwa nemwaitaise. Isi kimo utaamo nini Autaahaatihoniniso tati Autaahaatihopi sisipihindaase," tiwi kiyaami maarihoatihhi omayititihapi gwinyapenawaayopo.

8 Saiwi kiya mimapaiwi gwinyapenihauhi Jisaasiho keti usonataise. Usonatosa kiyai saundataase. "Sahi sami omayititihapi napaapi saiwi gwinyapenihopo?"

9 Piwaamairi kimairami maahiwa nga napaisihaatitaise? Nini utaahoai saunditi, 'Kinyi maipihaiwa nehimataayo,' unditandihaaro e 'Kinyi yutihiri gwaumbwi nanopotingirihiri dopi nawopi isisi numwe,' unditandihaaro?

10 Isihya Autaahaatihomihiyaimatitaatiwihhiyaami saaho Awaisiho jiho isihya nahatiyaami maipihaiwa nemaitandihoe tiwi mmoniwi gwinyaitaatiwi nini nasisitaani jasawise," undataase. Saundatosati Jisaasiho ikwauhiri biwateti namihatisihoai saundataase.

11 "Nini gisi kinyi yutihiri gwaumbwi nanopotingipipa dopi bitotapa nawopi isisi numwe hitataato," undataase.

12 Aihi isihiya ikwauhiri biwateti namihatisihoai baiwi iwinjasauhi ko doti nga itipiwati bitonda komi yutihiri nawoti isisi kiyaami ndiheti aimi keti naihi usonawaayopo. Aihi isihiya sandi mmonawaawi aungwohandi waati yaiwimawaayopo. Yaiwimapi Autaahaatihomi ambipati mepi autaahepumwawaayopo.

4.35-41

Kima Piwima Durihiraatiji Itinambitihiri Awaindi Waati Tiwayaasiji Jisaasiho Kiri Yatihite Undindihandapihaare

35 Jisaasiho saiwa piwiha kataunjamapi sura asisiha napandosura koai niwipinjohiyihiya otipipatihiyai saundataase. "Durihirami mihihinapi kopuhoti nutihaawo," undataase.

36 Sata nutihaawo undihi kiya atiwi kopuho Jisaasiho aimi bimisihoti naapwaatawaayopo. Naapwaatiwi kapihi isihiya wirisandihiyai namasi Jisaasihoaisawi nowaayopo. Niyauhi ami kopuho wiwaisangi maasi kiyaisa notaise.

37 Saiwi taawi niyauhi mbipa watipihapa durihiraatiji dotaise. Iyati durihiri neti ahoyati tiwayaasiji ami nausiha kopuhomi bopinini tiwayaati naweta ami mihatiji kopuhoatiji waapihaati nandaati tisaitataise.

38 Aihi sura Jisaasiho kopuhomi ahosihopi dawaapihi yutihiri (kusinihandi) mitaapaitaatiwihiri mitaapa nanotondaise. Siyati nanototiji komi otipipatihiyai owetitihahati kendaisi waapoho nanaati nawatisaanipani kinyi nyangi nyasonipi ginyunyaapaino?" undawaatopo.

39 Saiwi Jisaasihoai ahowimihauhi ko nepati mbipaisuni durihirisuni itihunda saundataase. "Mbipaaraŷe mbimwaapi bipi namihaape. Ami durihirangisangi waati timipiyaapi bipi yatihitipi ahomaimbi nimande," undataase. Sata Jisaasiho kaundihii mbipauni durihiruni yatihitati owendaise.

40 Aihi ko koai niwipinjohiyihiya otipipatihiyai saundataase. "Sahi napindapi yayopo. Nisapi sahi windi gimaanunyaahowo?" undataase.

41 Aihi kiya sandi mmonawaawi apiyaahi aungwohandi yaiwi sawana sanawaatopo. "Utaamo kimo napitetahondaatitindiho ami mbipa itipihoo itipinjitihanduni durihiri tiwayaasitihanduni komi piwiha atiwisati bipi keti owendaiso?" nnawaatopo.

5.22-24

Kima Piwima Jairaasihomi Metihaati Aimi Napomasihaati Jisaasiho Japihi Ahowimati Ami Apopaati Waati Komi Apotihiri Iwisihi Kaatami Timbipa Owetindihandapihaare

22 Aihi sura utaaho wo Judaahiyaami ayaayi piwihaapi ahoyanohaaayaayi jatisiho komi ambipati Jairaasiho Jisaasihoai usonatosati noti komi utatototi timahiya ahondaise. Timahiyati Jisaasihomi auhiraapihi ko atotipiwesataise.

23 Timahiya atotipiwesati ahondaati Jisaasihoai gouseti saundati nunjenataise. "Nisi maasihaama metihaati aimi napwitandi detisi ami kinyi kinyi ikwiri kaati ahiwitaapi namme. Ahiwisamihi kaati japihi nepati nga bimitando," undataase.

24 Sata Jairaasiho kaundati nunjesihi ami Jisaasiho komi nunjesiha atiwisati koaisati maasi komi ayipipihapi notaise. Siyati koaisati maasi naihi isihiya taahiyihiya wirisandiwi komihini numwihatiwi nowaayopo.

5.35-42

35 Siyati Jisaasiho kaati taati kaundihi Jairaasihomi ayipipihapihiya piwiha isisi noaipapi Jairaasihoai saundawaatopo. "Kinyi kimaamaati aimi napwisi napaapi nehihandi kataunjisihoai pohirundipi kaundise?" undawaatopo.

36 Ami Jisaasihohi kiya Jairaasihoai kaundohiha windi atihomaawise. Nehi metihaatami sapihoai saundataase. "Kinyi windi yamaime. Owe. Nisapi ko nga nisi metihaati titihiwiwitaase tipi nehi ginunyaape," undataase.

37 Aihi taahiyihiya niwipinjai niyohiyihiyai saundataase. "Sahi nahatiyaati nanipinjai namaapiwise," undataase. Saundatosati nehi Pitaahoaisuni Jemisihohaisuni ami Jemisihomi saingihohi Jonihoaisuni numwaasi nehi kingwaasisataahihi Jairaasihomi ayipipihapihi notaise.

38 Jisaasihotihohi kiyaatihohi nuwi Jairaasihomi ayipipihapihi noaipawaayopo. Noaipapi Jisaasiho mmonata isihiya pihitiwi yuya tiwi gwiwi nehotauihi usonataise.

39 Aihi Jisaasiho nandaati kaaayi taawi gwiwi nehotohiyihiyai saundataase. "Kimaati metimaati napotaamaise. Owe. Nehi nanotondaise. Isi sahi napaapi taawi gwopo?" undataase.

40 Sata Jisaasiho kaundihi kiya ko kaundisihaapi etitaatindaase tiwi sisawaayopo. Aihi kiya nahatiyai neti ipaahaapi natausaasatosati metihaati kaatami saniyi sapiyaisuni komi otipipatihingwaasisuni numwaasi maasi metihaati napoti ahotimbipihohi nandaataise.

41 Nandaapi bitotawa Jisaasiho metihaati napomasaamaatami ikwiri neti iwiwatata piwiha sawanaamihaara saundataase, 'Tarita Kumwi,' undataase. Sandi Tarita Kumwi, undindimandi saundataase. "Metihaaye, Nini gi kahitataatoni kinyi nepapi dopi bitose," undataase.

42 Sata Jisaasiho kaundihi kaati keti kuraanihi Komi piwiheti nepasi daayataise. Saati metaatami kinaungwiha 12 kiyahaate. Aihi isihiya ayaayi Jisaasihoaisawi nandaahohiyihiya sandi mmonawaawi apipaahi aungwohandi waati yaiwimawaayopo.

7.18-23

18 Nunjenihauhi Jisaasiho wihoaayiha kiyai saundataase. "Sahi isimiya kimiyaamatawi windi gimunyaahowo? Sahi windi moniwihyaato? Nehi nandapa nanihingipipa kinyi maariho omayititih neti maipitai ainjimotitaise.

19 Sandi kasatotimandi apaapimaasato ami nandapaahi nainjamihi noti witataatih kipwindisa ahorimaitaise. Nandapa kinyi nanihingipipa kinyi maarihoatih neti maipitandihandi owe." Ami Jisaasiho sandaati, nandapa nahataapa nehi gaahapaare wapa isihiya windi namandaatiwihapa windi ahimotise. Owe, tati kandaase.

20 Iyati Jisaasiho piwiha onihiwati jihaati kiyai saundataase. "Isihiyaami omayititih maarihoatih ainjotati maipihaiwa gwinyapenhohiwaiwa nehahaati ausaimanihauhi kaiwa isihiyaamiheti ainjotati maipindaise.

21-23 Isihiyaami maarihoatih maipitai maipihaiwa ahotiwaiwa siyahaiwaapito: Woho ami apopaati usihiya ami asihiya kihya kihyaisawi ambipati timaamaitiwi ami usaamihapa ikonwi ami isihiya siyihyai timapi ami woho apopaati komi kaatami warihoai apwaataati namasi namaatinotihandi nepi nopisasiwi kihaati kihoaisawi ambipati timaamaitiwi ami ikipipa ami wapa usaamihapaapi, 'Ese sapa nyamihapaatane,' tiwi maaritimapi ami apipaahi maipihaiwa kihaiwa kaiwi ami jaipipa kipiwi isipi katiwi ami mamaawisawiya maipihapa ainjotahapa maaritiwimapi kaiwi ami isihiya usaapi apousati manditipaiwi ami isihiya usaapi piwiha maipiha jaipitiwiha katiwi ami kiya nepi sawana genaniwi naimaatiwi ami naharimatihapa kaiwi naharimatahireti bimaawi, saiwa apipaahi maipimaiwa

isihiyaami maariho oma'yititihapi noaipasiwaiwa kiyai neti maipiyausoasihi Autaahaatihomi ndiheti kiya noaipapi maipihya ainjotahiyaimatawaayopo," undataase.

9.2-8

Kima Piwima Jisaasiho Noipati Wipetahoemainjitihandapihaare

2 Asisiha aimi 6 kiyati sanaihihura Jisaasiho Pitaahoaisuni Jemisihoaisuni Jonihoaisuni numwaasi sisiho utarihoaisini nasaamanataise. Aihi kasini sisihoaisini nehi sawanaahihi bitotawaayopo. Aihi kingwaasami ndiheti keti Jisaasihomi ambipati wipetahati noaipataise.

3 Iyati ami komi uti apotihiri noipati nehi kihoepe taanahitindaise. Iyati utaaho wo maapi yapipatambiho wapaara bausanati bausonihi siyati windi kihoepeimetitaise.

4 Aihi kingwaasi jawa Eraijaayi Mosesiya Eraijaayi Mosesiya sura jihura Judaahiyaami awaisururapitopo. Mosesiho winihapipa numwisihore. Aihi ami Eraijaaho so awaisiho jiho Autaahaatihomi piwiha atisati neti kopi awusaasihore. kiyaami ndiheti noaipapi Jisaasihoaisami maasi taami piwaatinjiji otipipatihingwaasi winjawaayopo.

5 Aihi Pitaaho Jisaasihoai saundataase. "Katipinyasingiho'ye, nyahi gaanihi kimbihhi bindihaayoni ayihaiwa gohaparihaiwa nausarisati maurimandi ayimatitaano. Waayi kinyapitanihi, waayi Mosesihopitanihi ami waayi Eraijaahopitanihi nyahi ayimatitaano," undataase.

6 Pitaahouni Jemisiyi Joniyauni apipaahi aungwohandi waati yayawaawi ami piwiha wa Jisaasihoai kaunditiha owetihi namati sandi Pitaaho kandaase.

7 Aihi tiwipati witi nasati kingwaasi neti napapihati namaasamataise. Aihi kati tiwipataatihapi piwiha wa Autaahaatiho Jisaasihopi katihi sataha noaipataise. "Kimo Nisi Maasihiho Akohotihhi Nini Koai Maariho nunyati wiwitihi ko piwiha kasatoniha baiwi atiwiiwise," taha noaipataise.

8 Aihi kingwaasi piwiha sa atiwosawi keti keti nepemainaniwi jawaahandi kandi isihya usaisi maawinjahopo, nehi Jisaasiho sawahohihi bitosihi iwinjawaayopo.

12.28-31

Kima Piwima Autaahaatihomi Winihapipa Awaimbipa Jihapaapi Sapa Awaimbipaare Undati Kaundindihandapihaare

28 Utaaho wo Judaahiyaami winihapipa kataunjisiho nasataise. Nasati atisata kiya Satiyusihiya nunjenihohiwaiwa Jisaasiho nga wihoaaýiha biyati ausaati nusesipati kaundihi ko winihapipa kataunjisiho atisataise. Siyati biyati gaaha kaundihiyataati namati komiha Jisaasihoai sata nunjenataise. "Winihapipa mahiwapaanihi apipaahi awaimbipa jihapaare?" undati nunjenataise.

29 Aihi Jisaasiho komiha wihoaaýiha koai saundataase. "Winihapipa apipaahi awaimbipa wapaisi nusatipihahapa kimbaare: 'Sahi Isiraherihyaate atiwise. Nyami Awaisiho Autaahaatiho nehi naasohihi ko Awaisihore.

30 Isi kinyi kinyi maariho kinyi amitiha gwinyaahingitihandi kinyi andititingitihandi kinyi watipihandi kinyi gwisihai saiwa nahatewa Autaahaatiho naasomiheti niyonihai kinyi Awaisiho Autaahaatihoaisaahihai maariho napaitipi nunye.'

31 Aihi ami winihapipa wapa awaimbipa kapihapa kimbaare. 'Kinyi kiwahoýi maariho naminipi kinyi ambipatisi maariho nunyapi baimbi napaitipi itatamanihingipatamataimbi kinyi naisohoi maariho nunyapi ami komi ambipatapihapa nunyapi iwitatamane.' Iyataati winihapipa wapa awaimbipa kimaursi nusatipihai awaimbipaaitandihapa apipaahi owetise," undati Jisaasiho koai kaundataase.

14.10-11

Kima Piwiha Judaasiho Noaipati Jisaasihomi Tiworihomainjitihandapihaare

10 Aihi sura Jisaasihomi otipatihaiya ikwimaindimwitihi auhirami yahuritisawihaiya aposerihyaami wo komi ambipati Judaasiho aunahipa Kariyotihandaahapiho tiworisai nusepaati mwitipiwitandi notaise. Noti pirihihiya mitihaiya jihaiya (isihaiya isihaiyaapi nandapa kohasipihohi tihaiwi Autaahaatihoai dipumanihai niyohiyihaiyaami) awaisawihaiyai Jisaasihoi kiyaami ikwiraatihimahonihai kiya tiwitaatiwi mwitipiwisati nusepaataise. Nusepaati, "Nini koai saindi sami ikwiraatihimati nasamito," undataase.

11 Satati ko mwitipiwisati kaundihi kiya pirihihiya atisawaawi gaaso tiwi waati maaritawaapo. Aiwi kiya Judaasihoi nawihohi wo numwitaatiwi

watipitiwi katawaatopo. Aihi Judaasiho Jisaasihoai kiyaami ikwiraatihimaitandihira daihiraapuni asisiha titihi gaaheti numwitandihapuni gwinyaati jatata timanataise.

14.44-46

44 Iyataati utaaho Jisaasihoai neti isihyaami ikwiraatihimaitandihira piwiha wa sata isihyai kaundamapihore. "Nini nundi utaaho woai naahipauma gerundisanaahi so Jisaasihosi ko naahipauma gerundohoi titihi isipise. Isipi baiwi iwinjaawitopi numwaasi nutaatiwe," undati kaundamapihore.

45 Isi ko keti noipati deti Jisaasihoapihiti titihi noti saundataase.

"Katipinyasingihonye," undati naahipauma gerundataase.

46 Aihi kiya sotihiso tiwi Jisaasihoai ikwira isipi wirawaayopo.

15.6-15

Kima Piwima Jisaasihoai Tiwitaano Undauhi Pairotiho Gaasi Tipi Nimaapise Undindihandapihaare.

6 Kinaungwiha nahateweti asisiha sa awaisiha Pasopaahandi noaipasihura isihya titihi kiyaisunyaapi utaaho wopi ambihitiwi utaaho soai nupusoase tiwi Gapinaaho Pairotihoai kaundauhaahi kiyaami ambihitiwi katotihoi titihi nuwausoasahore.

7 Isi sura utaaho wo komi ambipati Barapaasiho napwitati bindataise. So Barapaasiso Romihandaahapihiyaami gamaniho Judaahiyai iwinjaati bimitandihandapi poundihi isihya Judaahiya usaisi maatimaatiwi isihya usa dopi tiwauhi tunnawaawi kiyaami usaisi ko tiwihitiwi napwauhi kandapi koai nepi napuhauhore.

8 Aihi isihya taahiyihya wirisandihandi napiwi Pairotihoai namasawi nunjenawaayopo. "Kinyi asisiha awaisiha kimiyaha noaipasihura napwitohiyihyai nupusoasapiho'isi wani ami kati kaimbi nupusoase," undiwi nunjenawaayopo.

9 Aihi awaisiho Pairotiho kiyai sata nunjenataise. "Judaahiyaami awaisihoai bipi nehi nuta nini nandusaasano?" undati nunjenataise.

10 Sandi sata kaundindimandi siyati usona gwinyaataate. Isihya pirihiya isihyaami maipihaiwaapi nandapa maahoaipati tihwi Autaahaatihoai dipumanihohiyihyaami awaisawihya nyangi isihya nahatiya

namaanyipinjawi Jisaasihoai niwipinjowo tiwi Jisaasihopi apowih, "Nyahi gamanihomi awaisawihyaanamihetimawaayowo," tati gwinyaataate.

11 Kiyataahandi kandi pirisihyaami awaisawihya mitihya aimi jih timaniwi isihyai saundiwi nusepaawaayopo. "Jisaasihopi wihooayih Barapaasihoai nupusaase undiwise," undiwi awaisawihya nusepaipapi kaundawaatopo.

12 Aih Pairotho japihi kiyai saundataase. "Kimo utaamopi Judaahiyaami awaisih kiyai iwinja bimisihoe tohimoai nini napitiwitande?" undataase.

13 Aih kiya japihi waapihitiwi satawaatopo. "Ipi titih atawihateti tipi nimaape," tawaatopo.

14 Aih Pairotho kiyai saundataase. "Napaape? Ko windi maipihandi kaiho niwipihanditowo?" undataase. Aih kiya komiha nemapi jahaati waapihitiwi kaahaatiwi satawaatopo. "Jisaasihoai ipi titih atawihateti tipi nimaape," tawaatopo.

15 Aih Pairotho kiyaami piwiha napaisaati bipi atiwisati isihya wirisandihandi maaritorihireti Barapaasihoai nuwausoasih ko kiyenda naihi ami Pairotho katih Jisaasihoai ainjihariwi yupawaayopo. Aiw ipi titih atawihateti tipi tipimandaitaatiwi Pairotho neti Romihyaami pwisipi yaipa kaiwi tunniwi yahwinohiyihyaami ikwiraatihimataise. Aih kiya koai tipi tipimandaitaatiwi numwaasi nowaayopo.

15.33-39

Jisaasiho Napwindihandapihaare

33 Aih ipih aimi saniya otihasini 12 kirokihanditih nahataapipih asahatindihandi namaasati asahatamataise. Asahatimi noti ipih aimi noti yaataatisura 3 kirokihuraatih japihi taati saasinataise.

34 Iyati taati kura saasina bowih Jisaasiho waati kaahaata sandaase. |b"Eroi, Eroi Rama Sapakitani?"|r ndaase. Sandi sata katindimandi sandaase. "Nisi Autaahaatihoýe, Nisi Autaahaatihoýe, kinyi ningisi napaapi nanimahise?" ndaase.

35 Aih isihya kapihi deti bitohohiyihya sa piwa atisawaawi sanawaatopo. "Atiwise! Kimo utaamo Eraijaahopi gandaaso!" nnawaatopo.

36 Aih utaaho wo nihiti noti wainihandi ikonahandaatih siponjihandi windi dihaamatiyahandaahi timandaati boyati neti asatipatami otasaahaasini mwitiwati isisi niyataise. Niyati deti bitonda kandi Jisaasiho nandota

nunyataati kiyai saundataase. "Nyahi nehi jatitahaawo Eraijaaho ambihitisiho noatipati japihi napihausoasonihi yapipateti timihaiso e owetisotaato!" undataase.

37 Aihi Jisaasiho waapihita gaatamapi konihi napomataise.

38 Siyati Jisaasiho napwihi keti kuraanihi apotihiri wiri awairihiri mwipihiri watipihiri Ayi Awaindihandaatihi Autaahaatiho nasati komi ndimaahomwaaayi ahiyati bimitandiroti neti nimbipuwati nahoesandirihiri mihaatapi mihaapi kirinihi otutaati napwirinataise.

39 Aihi siyati Jisaasiho napwihi utaaho wo tiworisa tunniwi yahwinohiyihiyaami awaisiho Jisaasihomi deti utatototi bitonjahosi komi ndiheti napwihi usonataati ko sandaase. "Kimo utaamo titihi akitinihi Autaahaatihomi Mwaaho akohore!" ndaase.

15.42-46

Kima Piwima Jisaasihoai Nawiha Isihiya Soariwi Akohaahaiwihaatihi Ahiyotihandapihaare

42-43 Aihi utaaho wo komi ambipati Josepiho aunahipati Arimatiyaahandaahapiho sapihi bindataise. So utaaso kaunjoriho awaisiho wandihaisahore. Iyataati ami koaisangi Autaahaatiho komi isihiyai iwinjaati bimitandihandapi jaati bindataahore. Isi ko mmona gwinyapenata bosonihi kiya Judaahiyaami asisiha ikindaatiwiha Sapaatihandititaihi otipipati wapa windi kamaitihaawi wani kimura kahapaamapipa timanindaatiwihuraatihi gwinyapenata ipiho aimi namaatipaitandaihi namati ko yamaayati awaisiho Pairotihoapihi notaise. Noti noaipati awaisiho Pairotihoai Jisaasihomi ambipati ipi titihi atawihatetapi napihaati naitandi nunjenataise.

44 Aihi ko awaisiho Jisaasihopi aimi keti napwihindindiho tati waati gwinyapeninja tiworisa tunniwi yahwinohiyihiyaami awaisihoai gaata numwaataise. Gaata numwaati koai saundati, "Jisaasiho aimi napwiso e sangi napwiso?" undati nunjenataise.

45 Aihi awaisiho Pairotiho nunjesihi, aimi napwise undihi Josepihoai saundataase. "Gaasi, kinyi Jisaasihomi ambipati napihaapesi numwe," undataase.

46 Sata ko aye undihi Josepiho apotihiri wiri kihoepihiri nawiho nunya nesiya Jisaasihoai napihaati kiraapihi ahiya napapihataise. Napapihati isisi

niyati nawiha wa isihya soariwi akohaahaiwihoti ahiyataise. Ahiyatosati nawiha taapwiniha naayiha awaisiha neti nepehaasa maahomwaaýi anitisati awaahati napuwataise.

16.1-7

Jisaasiho Japihi Nepasitihandapihaare

1 Judaahiyaami asisiha Sapaatihandi aimi owetihí asahataahura asihya aunahipa Makitaraahandaahapi Mariyaahaatitihí ami Saromihaatitihí ami Mariyaahaati waati Jemisihomi sanaatitihí sinyá nuwí atipati witi biya waamainjotihati Jisaasihomi ambipateti nesaiwi nurihapi winjaitaatiwi nawiho nunyawí newaayopo.

2 Saiwi atipati waamainjotahati nunyawí nepi timaniwi nanopawí bowihí asisiha jiheti, Sandehura asisihaatihí kohokoaisawí ipiho aimi yahutaasihí kati atipati isisi Jisaasihomi ambipateti jaitaatiwi koai ahiyohipipihí nawihaami animwaahipataapihapi niyawaayopo.

3 Niyawaawí daihira otihapihí sawinya sanawaatopo. "Ese! Jisaasihoai ahiyotihandami maasomwaaýi mipateti nawiha aungwohanda nepehasawí anitiwi napuhowí ndi neti nepehaasa nuwatinyositande," nnawaatopo.

4 Saniwosawí naingaapí jawa wa nawihandí windí maasomwaaýi mipateti namaapundihi utaaho wo neti nepehaasa nemasihí nehí maasomwaaýi nundihi jawaayopo. Iyataati sa nawa apipaahi awaisiha naayíhaare.

5 Siyati maasomwaaýi nundihi kiya nandaapí mihatihí jawa utaaho wo waimwaaho apotihiri nehí aminaihiri kihoejihiri utarihiri nipaataho ikwirí gaatihiraihoaaýi bimihí iwinjawaayopo. Iwinjaposawí waati yaiwipwitawaayopo.

6 Yaiwimahauhi ko kiyai saundataase. "Sahí windí waati yamaiwise owe. Sahí Nasaretihandaahapi Jisaasihopí daapí nasauhi nini aimi jasoho ipi titihí atawihateti nimaapí tipimandaahohihopo. Isi ko windí kimbihí ahimotise owe. Aimi japihi nepasi naise. Koai ahiyohipipihí kimbihisi sahí sawanaati mmowise.

7 Isi sahí nuwí komí otipipatihiyai kaundiwise. Aiwi ami Pitaahoai maawi kaundiwise. Kaundawaawí saundiwise. "Jisaasiho aimi jihí satindihande, 'Nini napotati japihi nepasi Garirihandaahapi nini jihí taati naito,' undindihandisi

aimi nepasi ko j̄ihi Garirihandaahap̄i naisi kiya koai kap̄ihi iwinjaita ipoti naita kaundiwise," undataase.

16.15-16

15 Iyati kiyai p̄iwiha sata kaundataase. "Sahi yap̄ipati nahatewaara gaamapi nuwi isihiya nahatiyai nisi P̄iwiha Gaaha Waniha anusaapi kaundiwise.

16 P̄iwiha Gaaha Waniha kandi kiyoh̄iwaiwaapi ausaasahi utaahe itapaati wo waati atisati p̄iwiha kaapuni nisapuni ginunyaasiho ginunyaasaamaati waapohora baawusisahi Autaahaatiho soai saati j̄ap̄ihi numwaitaise. O utaahe itapaati wo waati nisapuni ami nisi p̄iwihaapuni nepi nimbipwitiwi windi gimaanunyaasiho gimaanunyaasaamaati ipotihura kinyi maipihoye, maipihaaŷe undati komiheti kaatamiheti Autaahaatiho p̄iwiha neti yawutoaati yaawihandi nunyati nemaitaise.

16.19-20

Kima P̄iwima Jisaasihoai Autaahaatiho Numwaasi Yamihapataatihap̄i Naindihandap̄ihaare

19 Awaisiho Jisaasiho p̄iwiha saiwa kaunda owetih̄i Autaahaatiho koai yamihapataatihap̄i numwaasi naihi niyati yamihapataatih̄i Autaahaatihomi ikwiri gaatihiraihoaŷi bindataise.

20 Aih̄i komi otipipatih̄iya yap̄ihi nahatewaara nuwi gaamapi Autaahaatihomi p̄iwiha gaaha waniha Jisaasihop̄itaha awusoawaayopo. Siyauhi Awaisiho kiyai anditiwiwa kiyaisatitih̄i kiya watip̄ihaiwa kaiwa kaiwa kiyauhi isihiya mmonawaawi Autaahaatihomi p̄iwiha akitiha akaahaare tawaatopo. Isihiya amitihaisahiya taahiyih̄iya kima p̄iwima (16:9-20 ma) Maakiho sawaho j̄ipatiŷaise ami utaahe wo ipoti j̄ipatiŷiyataise tiwi gwinyaawaayopo.